

SÎMOR

Nexweşxaneyê tirkî ya hemû musulmanan

Min wisa hizir dikir ku dema yek diçe wê derê tenê Xwedê û pêxember li bîra wî dimînin, ez bi xwe wisa bûm. Tenê min ji xwe re nimêj û taetê Xwedê dikir û çî tiştên din li fikra min nebûn. Ji dergehê (heremê) û wêde, wan nexweşxaneyek mezin û modêrn durist kiribûn û bi zimanê xwe û bi zimanê erebî jî li ser nivîsandibûn: "Ev nexweşxane ji hemû musulmanan re ye". Caran dema ez bi hevalên xwe yê kurd re li hember dergehê wê re derbaz dibûm û çavên me bi wê nivîsandina kesk diket kêfa me jî gelek dihat û me digote hevdu: "*Van karekî pir baş kiriye...*" Em jî musulman heger carekê Xwedê nekir yek ji me nexweş bikeve ew wê me çare bikin. Ez dirêj nakim şeva beriya cejnê hevîna min nexweş ket em tev lê êwirîn û cilên ku ji Kurdistanê bi xwe re anîbûn me li berkirin û bi çî halê heyî me nexweşa xwe gehande devê nexweşxaneyê hemû "**musilmanan**". Bi lezî du birînpêçên jin ber bi me ve hatin û nexweşa me ji nav destên me anîn der û ber bi hundir birin û bi zimanekî erebî yê bê ser û ber yekî ji me re got: "*Hûn serçavan hatin ey mêvanên mala Xwedê*". Cilên ku li Kurdistanê me li ber xwe kiribûn, zelaman her yekî alayeka Kurdistanê ya biçûk bi sîngê wî ve bû angû baş xuya nedikir, lê yê jinan her yekê alayeka mezin bi piştê kirasê wê ve bestibûn ku her ji dûr ve xuya dikir. Lê li vê derê ger ez ya rast



Luqman Asîhî

bibêjim hîngê ji hevîna min zêdetir çî kesên din û çî tiştên din li bîra min nebûn û ez di wan hizran de bûm ku ne ku dayika zarokên min di nava destên min de bimire û ez dûr!... Di wan xeyalên xirab de bûm min dît du birînpêçên reng esker destên nexweşa me girtine û wê bi lezûbez ber bi me ve dihajon! Nêzikî me bûn û bi zimanê xwe û bi dijarî û dûr ji hemû pirînsîpên rêzlênanê gotin: "*De zû çî kes ji we di hundirê vê derê de nemîne, bila dewlet û ala we, nexweşa we çare bike!*" Dema min ji hevîna xwe pirsî, ka sebebê vê hemû yekê çibû. Got: "*Gava çavê wan bi wê alayê ket ku li ser piştê min hatiye duristkirin, ji min pirsîn tu ji bakûrê Îraqê yî tu kurdî û ciyê we û ala we li vê derê nîne zû bi zû biçê derê.*"

Li derveyî nexweşxaneyê hemû musulmanan -ji bilî kurdan-, min ji pîrek û hevalên xwe re got: "*Tirk ne weka çî kesane her tiştê wî di çarçoveyê hizra wî de dilive û tenê pêvajoya dîrokê dikare keviran ji ciyên wan biherikîne.... De zûbin da em dermanekî ji nexweşa xwe re peyda bikin...*"